

«Jau vi rinforzar la fidanza en la politica»

Jon Pult vules daventar cusseglier dals chantuns

DA GION NUTEGN STGIER / ANR

■ **Ier ha la ps grischuna preschentà la campagna electorala per Jon Pult, el che candidescha per il cussegl dals chantuns.** Far il zap a Berna vul el cun far ina politica reala, averta, transparenta e per il clima. En la chombra pitschna vules l'Engiadinais represchentar ina nova generaziun. Dapi il 2011 represchentan *Stefan Engler* (pcd) e *Martin Schmid* (pld) noss chantun en il cussegl dals chantuns. Omadus han sa fatg in bun num a Berna e quai è er ina da las raschuns ch'ìls dus cussegliers dals chantuns candideschan per in'ulteriura perioda tar las elecziuns naziunales en tschintg mais. Dal reminent represchentan dapi 170 onns cussegliers dals chantuns burgais il Grischun en quel gremi politic. En la chapitala svizra.

Cun 35 onns in vair «shooting star»

Engler e Schmid n'èn lura betg ils dus singuls candidats per quels dus sezs grischuns en la chombra pitschna. Concorrenza survegnan els da *Jon Pult*, el ch'è stà set onns president da la ps chantunala e divers onns er deputà. L'um da 35 onns e «shooting star» da la ps candidescha per il cussegl naziunal e lura er per il cussegl dals chantuns. Ier è el sa preschentà a las medias cun ses arguments che duessan persvader ils electurs da dar ad el la vusch sco candidat per il cussegl dals chantuns. Che Pult fa il zap en la chombra pitschna dal parlament svizzer è bain in pau improbabil sin fundament da la gronda concorrenza. Ch'el vegn elegì sco cusseglier naziunal, quai è gia oz segir, er cun el esser popular sur ils cunfins politics da



Jon Pult vul daventar cusseglier dals chantuns per il Grischun.

FOTO G. N. STGIER

la ps. Ina giada ch'el vegn ad esser a Berna vegn l'um, che discorra perfetg tuttas quatter linguas naziunales, segir a far carriera. Sia retorica clera, transparenta e da persuasiun, quella è gia dapi che Pult fa politica enconuscenta.

Porscher ina dretga elecziun

Doris Caviezel-Hidber, la vicepresidenta da la ps grischuna, ha ditg che cun la candidatura da Pult per il cussegl dals chan-

tuns veglia la ps porscher a la populaziun ina dretga elecziun e na be ina conferma dals dus cussegliers dals chantuns existents. La ps da noss chantun lascha betg tiers quai. Per blers dals vischins saja quai stà avant quatter onns ina vaira pretesion che be duas persunas sajan sa messas a disposiziun per ir a Berna en la chombra pitschna. Pult saja in candidat competent, cun ina clera lingia, curaschus, independent e cun in bun profil politic.

Durant il cumbat electoral veglia la ps ir encunter a la glied, inscuntrar la populaziun sin via, en quartiers, contactar ils electurs per telefon e quai tut per persvader ils Grischuns che Pult saja il dretg candidat per il cussegl dals chantuns, ha ditg Caviezel-Hidber.

Nagins auters mandats

Sia finamaira saja da daventar cusseglier dals chantuns, ha Pult ditg ier a Cuira. Ils

politichers duajan esser averts envers sias ambiziuns e finamiras politics. Er bunas persunas da la politica duajan far plaz ad autras. Gist quai haja el fatg e na pli candidà il 2018 per il cussegl grond. Sia ambiziun saja da represchentar noss chantun en il parlament svizzer e sche pussivel en la chombra pitschna. Sin giavisch da la direcziun da la ps grischuna candidescha el per il cussegl naziunal e per il cussegl dals chantuns. Il Grischun dovra ina collecziun da candidats per il cussegl dals chantuns, ha menziunà Pult. Ultra da quai duai la trilinguitad da noss chantun esser represchentada en la chombra pitschna. Il medem pertutga er la generaziun giuvna che manca en il cussegl dals chantuns. Politica saja da far per la generalitad e na per interess persunals, per interess speziels e be per interess economic ubain per plirs cussegls d'administraziun. Vegnia el elegì en il cussegl dals chantuns renunzia el segir ad auters mandats lucrativs, ha punctuà Pult.

Avert per l'Europa

El saja er fitg avert per l'Europa e per las cunvegns da basa cun l'EU. Las cunvegns cun l'EU sajan bain per gronda part en urden, dentant duessan quellas cumpigliar il schurmetg da las pajas en Svizra. Ellas na dastgian però betg manar tar ina miseria da las pajas en noss pajais, ha ditg Pult. A Berna vules el s'engaschar per las energias regenerablas, per la forza idraulica, per il clima, per ina Svizra sociala e per in tractament egual da la populaziun e da mintga uman. En la politica svizra n'hajan il nepotissim e la predominanza nagin plaz, ha manegià Pult. Ina da las sias grondas sfidas saja er da rinforzar la fidanza en la politica.